



Tir Yimym

www.tirymim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymim@gmail.com

TAPAK 8

**Italy Ato Kiloner Conte
mapanungi anentsü**

TAPAK 3

**R-Day nung Meghalaya Raj
Bhawan indang postal stamp saya**

VOL. XVIII NO. 103 (ADOK 103) DIMAPUR

RASEMNÜ (WEDNESDAY) AENJETI (JANUARY) 27, 2021 ₹ 5.00

COVID Nagaland: Nisung 95 dang anepaludar

Dimapur, January 26 (TYO): Mongulbarnü Nagaland nung nisung ana dak COVID-19 aliba putet aser pamok züngsema nisung ajak agi 12,081 kümogo. Külen, nisung 3 taneptsü anguba sülen tang anepalur nisung 95 dang kümogo.

Tanü Dimapur nung nisung 2 aser Kohima nung nisung ka taneptsü angu. Parnok züngsema taneptsü angur ajak agi 11,756 kümogo, ta Health & Family Welfare, Dr. Denis Hangsing-i ashi.

Nagaland nung COVID-19 puteter nisung 88 süogo aser 142

tanga state temi ogo, ta paisa metetdaksü.

Nisung 12,081 rongnung Traced Contacts 4,984, armed forces personnel 4,667, tanga state tem nungi arur 1,857 aser Frontline Workers 573 lir, ta Dr Hangsing-isa ashi.

"Tang anepalurtem rongnung nisung 12 dak shirangba yimya terara lir aser 2 oxygen agüja anepaludar. Nisung 81 dakbo shirangba yimya kecha mali" ta paisa ashi.

Nagaland nung COVID-19 alitsü akok ta temolung melemi bilemba sample 1,24,186 tendangogo.

Aluyimertemi Red Fort tonga ao; Tractor Parade anenba osang sangoktsüogo

New Delhi, January 26 (Agencies): 72 buba Republic Day nung aluyimertemi Delhi nung tractor rally agitsü lenmang toktsür Red Fort leni aoba ajanga mepetmesü tulu ka adokogo.

Tanü aluyimertemi police den raratep, lenmang noktangbatem raksatsü aser Red Fort telungi ai. Police-ia tear gas khaloktsü aser lathi charge asü.

Iba tatalokba ajanga public kiojentem raksatsü aser police aika yiruogo, ta Delhi police-i ashi. Ajisüaka, Samyukta Kisan Morcha-ibo ozüing alema inyakba maparen nung parnok maden ta shiogo.

Lungkak aitba aluyimertemi lenmang shibanga aliba nungpoka aotsü merangdang nisung ka asü. Parnoki Red Fort tonga ao aser tamangba yimsü indang wako ka atsüket. Ajisüaka, police-i parnok iba tesem nungi anien saka aluyimertem Ramlila grounds nung lir.

Mongulbarnep aluyimertemi mapang jelia lenmang noktang ayubatam raksatsür Delhi telungi ai. Iba ya atalokba sülen Samyukt Kisan Morcha-ibo tractor rally anenba sangoktsüogo aser ozüing alema inyakertemi iba mapa ya inyak ta shiogo.

Tanü Union Home minister Amit Shah-i National Capital Region (NCR) nung Internet shibangtsü atema senden ka ayonga amen. Iba nung Delhi aser Uttar Pradesh o Haryana kübok tesem kar dena lir.

Union Home Ministry-i Delhi artsülen- Singhu, Ghazipur, Tikri, Mukarba Chowk, Nangloi tesemtem nung telecom services shibangtsü tetuyuba agütsüogo.

Senden nungsa Delhi nung paramilitary forces talila mapa lemozüksütsü onük benoka jembü. Külen, Punjab aser Haryana nunga kümangtsü osang metetdaksüogo.

Delhi Police-i tractor rally alitsü atema lenmang shimtsüba den

mapang latettsü saka Kisan Mazdoor Sangharsh Committee-i iba lenmang nung dangbo mesenzütsü ta ashi. Tanep 8:00 ako meta aluyimer meyrjang aika tetsüing agi Delhi telungi ait.

Delhi Police-i lungkak aitertemi dang timi dang shilem agitsü mepishiaka, Delhi kübok ITO tesem nung ozüing alema mapa inyaktsü tenzü. Iba tesem nung Delhi police headquarters lir.

Aluyimer ka Delhi-i arudang pai aniba tractor meküpok aser idangji pa asü, ta police-i ashi. Iba lendong atalokba sülen aluyimertemi mener lungkak aittsü tenzü. Iba tesem nung Delhi police headquarters lir.

"Onoki Modi'er sorkar nem osang ka sangoktsütsü atema aru, onok mapa inyakogo. Onoki joko meypa aotsü" ta Red Fort nung aluyimer kati osangbener dang ashi.

"Parnoki noktangyonga onok Red fort tonga aruogo. Onok indang alizüing matong tashi manentsü. Farm laws asem meypa agitsüla" ta ano tanga aluyimer katia ashi.

India nung aluyimer telok tongti ka- Samyukt Kisan Morcha-i tractor rally anenba aser aluyimertem dang Delhi arrtsü temalen lungkak aitba tesemtemi meypa aotsü metetdaksüogo.

Parnoki timi dang lungkak aittsü aser tarutsü atema teinyaktsütem lemtettsü, ta Samyukt Kisan Morcha-i ashi.

"Onoki timi lungkak aitba nung ozüing alema inyakertem aita lir. Onok atema tashiji yimjung ta asüba tangatetba nung inyakka arur. Ozüing alema inyakba mapa ajanga lungkak aitba sentong nung timtem bentsür arutsü ta onoki bilemer. Ita 6 tema inyakka aruba aser Delhi arrtsülen anogo 60 tema lungkak aita aruba ajanga iba tensa ajuruogo" ta Samyukt Kisan Morcha-i sangdong ka nung ashi.

Wb. L.Sanen alima nungi pilaogo



Dimapur, Jan. 26(TYO): Akhoya nungner wabong tajung, Nagaland

state mangu dang nungi zünga shia meteter tesayur inyakka alisang aser state nung nüngtugu ketdangser Wb.L.Sanen Ao Mongolbar nü par ki Dimapur nung lia alima nungi pilaogo. Pa arishi kum 94 liasü.

Pa ya Nagaland government nung mezüngpur NCS officer liasü aser Secretary tashi inyaker 1988 küm retire asü.

Pa den asüpila sentep sentong January 27, 2021 nikongdang 1:00 PM nung par kidang Half Nagarjan nung alitsü renema lir.

Governor RN Ravi-i India aser Nagaland kümteter tem dang pelar Department balalai terenlok mapa inyakba osang metetdaksü



Nagaland Civil Secretariat Plaza, Kohima nung 72 Republic Day benjung amongdang Governor, R.N. Ravi-i Rashtriya Salute agiba noksa nung angur. (Kohima, January 26)

Dimapur, January 26 (TYO): Mongulbarnü Secretariat Plaza, Kohima nung 72 buba Republic Day benjungmong nung o jembidang Nagaland Governor R.N. Ravi-i India linük aser Nagaland state kümteter tem dang pelaba metetdaksü.

"Linük kümteter temi bendanga agütsüba, asentzü asenba aser azü yimdokba ajanga India Republic kümtet. Külen, state kümteter temi Naga nungger libaliro, ali aser rongsen temzüing agi kümzüka yua Nagaland kümtet. Anungji parnok ajak dang kanga pelar" ta R.N Ravi-i ashi.

"Tesüiba küm ka COVID-19 ajanga alima timtema arur aser iba nung India dena lir. Mongin nisungtemibo India nung iba wara ajanga nisung aika taküm samatsü aser takoksa jenti ajurutsü ta ashi saka India-i ibaji matalokdaksü. Iba atema asenoki COVID anema tongti süa rarartem- doctor, nurse aser tanga frontline worker ajak dang kanga pelar" ta paisa ashi.

Tesüiba küm ka tsüngda India-i kecha maliba nungi aika yanglutetba linük ka kümogo. Tanü asenoki PPE, ventilators aser mozütem tanga linüktem dangi yoker. Prime Minister, Modi lenisüba kübok sorkari January 16, 2021 nungi alima nung vaccine agütsüba mapa tulutiba tenzüko. COVID-19 vaccine angutsü tenzüker hopta ka tsüngda asenoki kidanger linüktem dangi vaccine yokogo. Alima nung vaccine 60% ji India nung yanglur aser COVID-19 wara anema raraba nung asenoki tongti shilem agir, ta Governor-isa ashi.

Nagaland-ia Atmanirbhar Bharat yangertsü atema inyakba nung shilem agir. Nagaland-i COVID-19 tayongzükbka anema tasü itta raaogo. Nagaland nung testing lab ka danga maliba nungi tangbo 3 yangluogo. Nagaland nung frontline workers-i kanga dang takok ngua iba wara anema rarayonga arur, ta RN Ravi-isa ashi.

"Nagaland nung health workers 19,000 nem Covid vaccine

agütsütsü atema mapa tenzüko aser iba sülen tanga frontline workers 30,000 shi ka nem agütsütsü. Maneni, tasembuba shilem nung nisung lakh 3.4 shi ka nem Covid vaccine agütsütsü sentong lir. Ajisüaka, asenoki COVID-19 inyakyimtem sülen anidaksüla" ta paisa ashi.

Nagaland Governor-isa Department balala ajanga mapa inyakba osang lemsatepdang Agriculture Department-i organic farming nung temolung agütsüba indang ashi.

MOVCD-NER kübok OneCert International ajanga organic certification agütsüogo aser tang tashi nung Nagaland nung ali hectare 13,000 tashi certify süogo, ta paisa ashi.

Maneni, Horticulture Department-ia rongsenkettsüing tsütsü renloktsü atema sentong renemogo. Iba nung kilen 10,000 atema aonsotsü yimtsüing 100 renlodaksütsü, ta RN Ravi-isa ashi.

Land Resources Department-i 2020-21 mapang Rubber Development Scheme kübok rubber lu ayimer nem rubber sheet rollers 215 agütsüogo. Coffee plantation kübok ali hectare 1000 tashi aniokogo aser project villages 409 nung permaculture design nung kitchen garden tenzüko.

Animal Husbandry & Veterinary Services Department-i shiruru metsür nem Low Input Technology Chicks 80,000 aser weaner pigs 1000 shi agütsüogo. Water Resources Department-ia PMKS Y-HKCP(IC&GW) kübok Groundwater Irrigation indang unit 262 inyaker. Iba ya Rs. 18.06 crores endoka district pungu-Dimapur, Mokokchung, Peren, Mon, aser Wokha nung inyaktsü, ta Governor Ravi-isa metetdaksü.

Environment, Forest and Climate Change Department-i Japan International Development Agency den yaritepa yimtsüing 185 nung Nagaland Forest Management Project inyaker. Urban Development Department-i

AMRUT jilatem- Kohima aser Dimapur nung Atal Mission for Rejuvenation and Urban Transformation (AMRUT) kübok infrastructure projects 27 inyaker. Item ya 2020-21 tashi nung tembangtsü. Swachh Survekshan 2020 sentong nung Nagaland kübok Urban Local Body asem-Mokokchung, Chumukedima aser Pfutsero-i North East Zone nungi takok balala nguogo, ta Governor-isa metetdaksü.

Department of Underdeveloped Areas (DUDA)-ia 2020-21 tsingda backward areas nung mapa balala inyaker. Underdeveloped Areas Program (UD AP) atema Rs. 17.85 crores aser Border Area Development Program (BADP) atema Rs. 11.20 crores endoka parnoki mapa balala inyaker, ta paisa ashi.

School Education Department-i sorkar school ajak nung Continuous Learning tenzüko. Department-isa inyaksangshi nung tashishitsü malitsü atema Online Teachers' Transfer inyakyim tenzüko, ta Governor Ravi-i ashi.

Chief Minister, Neiphiu Rio-i December 27, 2020 nü Government Polytechnic Aboi, Mon lapoktsüba ajanga Technical Education Department jenjang ajungketogo.

Yaküm August ita nungi Noklak district kümtet saka January 20, 2021 nung ang iba ya official küma Nagaland nung district 12 buba aküm. Nagaland nung mapang tatsüka law & order khuret majurui arudar, ta Governor Ravi-isa metetdaksü.

"Nagaland nung infrastructure tekaraba nung renlok daksütsü atema Ministry of Road Transport & Highways-i Rs. 10,972 crores endoka gari lenmang kilometer 952 yanglur. Külen, Ministry of Railways-ia Rs. 7,114.55 crores endoka Dhansiripar-Zubza railway line yanglur. Anungji, nübortemi item gari lenmang aser railway mapatongtem tekaraba nung tembanga inyaktsü atema yaritepdaksünür" ta Nagaland Governor-isa ayongzü. Sangtam-isa ashi.

Tanü NCD Councilors senden amentsü

Dimapur, January 26 (TYO): Naga Council Dimapur (NCD) Councilor ajak January 27, 2021 nü senden nung adentsü metetdaksüogo.

Sendenji anepdang 11:00 ako nung Council Conference Hall Nyamo Lotha Road nung alitsü ta NCD General Secretary, Thsaponkyu Sangtam-i tanü sangdong ka nung ashi.

NCD ya tanga Civil Society ka ama inyakyim aser temzüing lateta

aliba sülen anidaker. Okadak ken o ka benoka alibaji NCD-i meteta lir aser tongti lokti ka ama tanga teloktem akhümtsübur. Ajisüaka, tangari/teloktemi NCD dang inyakka aotsü tuyuba magizüker, ta paisa metetdaksü.

Ken o mesüra tebilemtsütemji olemtep aser sendentem ajanga jembishnüa angatetteper aser iba atema NCD-i senden amentsü ayonger, ta Thsaponkyu

Guwahati High Court (Kohima bench)-ia January 22, 2021 nü Civil Judge, Senior Division Dimapur aser Principle District Judge Dimapur ajanga tuyubatam sota atatsü metetdaksüogo. Iba ken o ya mangadang tashi item tetuyubatam sota atatsü aser telok ajaki tebang meii atatsü shiogo, ta NCD General Secretary-isa metetdaksü.

State tesem ajungalen 72 buba Republic Day mungogo



Dimapur, Aenjeti/January 26 (TYO): India nungur 72 buba Republic Day anogomung ya Mokokchung nunga January 26, 2021 nü Imkongmeren Sports Complex nung munga liasü, kong Minister Higher Education & Tribal Affairs Nagaland, Temjen Imna Along ya tongti tesemdang liasü.

Iba sentong nung tongti tesemdang liasü nisan salatsü aser Republic Day nungtem nung o jembia parade commander Y. Khochamo Humtsoe, A/C 2nd NAP Bn. Alichen aser 2nd I/C ABI, Semou Angami SM RHQ, Mokokchung na lenisüba kübok aliba march past semdanga liasü.

Government of India indang Beti Bachao Beti Padhao campaign kübok academic year 2019-2020 nung Government School tem nungi primary level - class V nungi VI - aser upper primary level - class VII nungi IX - tashinung tetsür kaketshir noklang shilemi takok anguba kakets reju tem nem tongti tesemdang liasü. Maneni Naga Wadri Club, Ungma village ajanga sobaliba tsüngsang ya sayu aser iba sülen department balalai amenoka aliba exhibition stall tem tongti tesemdang liasü.

Phek: Linük tanünga ajanga den külemi Phek Hq nunga January 26, 2021 nü 72 buba Republic Day mungogo, kong Minister, Planning & Co-ordination, Land Revenue and Parliamentary Affairs, Neiba Kronu ya tongti tesemdang ama dena liasü.

Pai linük nisan salaja Rashtriya salute agütsü aser parade contingent tem semdanga Beti Bachao Beti Padhao kübok takok angur nem sempet agütsü liasü.

Iba anogomung nung march past contingent ya 22 Assam Rifles, Phek, DEF, Phek, 5th NAP Bn. Phek, NCC GHSS, Phek, Student Police Cadet Phek, Government Higher Secondary school Phek, Holy Care School Phek aser Royal Foundation School Phek nungi liasü.

Sentong nung Elite Music Ensemble, Phek ajanga temeja ken ka aten aser Phek District Taekwondo Association ajanga parnok sempet sayua liasü aser Pochury women hoho ajanga sobaliba ken ka aten aser Jericho-II Youth Society ajanga sobaliba tsüngsang ka sayua liasü.

Iba anogomung nungtem nung SBI aser NABARD, Phek ajanga district jail semdang aser Social Welfare Department, Phek ajanga district hospital semdanga liasü. Maneni nikongdang Inter-Departmental Penalty Shoot Out liasü aser iba sülen sempet lema agütsü.

Dimapur: Dimapur nung 72 buba Republic Day ya DDSC Stadium, Dimapur nung munga liasü, kong Speaker, Nagaland Legislative Assembly, Sharingain Longkumer ajanga linük nisan salatsü Republic Day nungtem nung o jembia liasü. Maneni Contingent trok nungi march past nung shilem agi.

Iba sentong nung Pretty Rhythm ajanga temeja ken ka aten aser tongti tesemdang liasü exhibition stall tem lapokja liasü.

January 18, 2021 nungi February 17, 2021 anogo tashi ya National Road Safety month ta nungja agütsü sentong balala inyakyonga arur, aser iba nungtem nung Dimapur Traffic Police ajanga kakets tilaka saya aser sentong nung lema agütsü, kong Motor vehicles (Driving) Regulations, 2017 indang teshimtet kar zülua lir.

Maneni 15 IR (Mahila) ajanga Retreat agiba sülen sentong tembanga liasü.

Peren: Linük tesem ajanga den külemi Peren nunga 72 buba Republic Day ya Deputy Commissioner Office Complex, Peren nung January 26, 2021 nü mungogo, kong Minister, Soil & Water Conservation, Geology & Mining, V. Kashiho Sangtam ya tongti tesemdang ama arua aden.

Tongti tesemdang aruba sülen linük nisan salatsü aser parade continent tem dang nungi Rashtriya Salute agia liasü. Iba sülen tongti tesemdang liasü Republic Day speech agütsü aser march past agi.

Peren nung Parade Contingent tem ya DEF Peren, 9th IRB Saijang, All Saints Hr. Sec. School Peren aser School Police Cadet, GHSS Jalukie nungi liasü.

Maneni Jalukie Students' Union ajanga sobaliba ken aser tsüngsang agi shilem agi aser Leibung Nroai Maame (BBBP) ajanga ken ka aten aser Voice Impact 2019, Peren takok angur Kewizin-ia temeja ken ka tena

liasü/

Iba anogomung nungtem nung anepdang linük indang nisan ya sorkar office, nisung alidak aser reju balala nung songa liasü. Kasa mapang Jalukie nung ADC, Dr. Tinojongshi Chang ajanga linük nisan salatsü.

Noklak: Noklak nung January 26, 2021 nü Republic Day amungba mapang Advisor, Prisons, Printing & Stationery, Government of Nagaland, H. Haiying ajanga linük nisan salatsü.

Paisa parade contingent tem nungi rashtriya salute agi. Iba march past nung DEF, Noklak, Village Guard, Tsuwao aser Village Guard Choklangan temi shilem agia liasü.

Assistant Commandant, 3rd NAP Logubo ya parade Commander aser ABI, Imkum Meren Imsong DEF, Noklak ya second in command liasü aser SP, Noklak ajanga parade semdanga liasü.

Tongti tesemdang Advisor H. Haiying-i iba anogomung nungtem nung jembia mapang, Noklak district ya January 20, 2021 nü semzütsü aser state nung district 12 buba kumogo, ta ashi.

Iba sentong nung A Coy 45 Assam Rifles ajanga prangbong hadir balala nüburtem dang sayua liasü. Iba sentong nunjg Harmanas band ajanga linük naklo ken aten, aser ano Khamniungan Menyui Hoikam (KMH) aser Bukho Chai ajanga temeja ken tena liasü.

Iba anogomung nungtem nung Indian Red Cross Society, Noklak aser Khamniungan Menyui Hoikam ajanga Adora Children's Home,

Noklak semdanga liasü.

Tuensang: Tuensang nung 72 buba Republic Day ya Parade ground, Tuensang nung January 26, 2021 nü munga liasü, kong Minister, Public Health Engineering Department, Jacob Zhimomi tongti tesemdang ama arua aden.

Iba anogomung tenzüka sorkar/ nija ki aser shishilempadak tesemtem nung linük indang nisan asong aser iba sülen DIG Range Tuensang ajanga parade semdang aser Rashtriya salute agütsü. Iba sülen tongti tesemdang liasü parade semdang aser iba anogomung nungtem nung o jembia liasü.

Iba anogomung nung DEF, 3rd NAP aser 3rd NAP Pipe band ajanga parade nung shilem agi, kong Bunglang Chang DySP (R) ya parade Commander aser Athriti (SM) ya 2 I/C ama shilem agi. Maneni iba sentong nung Chan, Sangtam aser Yimchunger cultural troupes temi sobaliba tsüngsang aser ken balala sayua liasü.

Iba anogomung nunga Eleutherios Christian Society (ECS), Rev Achu Chang ES CBLT, Tuensang Town Baptist Pastors Union, Dr. John Shupao Nodal Officer COVID 19 Tuensang, COVID 19 Sample collection and testing team, Mudang Khamniungan Asstt Professor Sao Chang Government College, Changkhumba GT, Chempilila Sangtam aser Mahan Driver ITI Sedam nungtem nem district commendation award agütsü liasü.

Tongti tesemdang liasü Agri & Allied Department Tuensang ajanga

ayongzüka exhibition stall tem lapoktsü aser Bedi Bachao, Bedi Padhao ajanga penalty metsütepba sentong ka tetsürtem kisüing atema ayongzüka, kong team 40-i shilem agia liasü.

Mon: Local Ground, Mon Town nunga 72 buba Republic Day anogomung munga liasü.

Superintendent of Police Mon, Imnalensa Ao IPS ajanga Parade Review agiba sülen sentong tenzüka, kong Minister, PWD Housing & Mechanical, Tongpang Ozukum tongti tesemdang ama dena liasü. Tongti tesemdang liasü nisan salatsü aser parade semdanga liasü. Tongti tesemdang liasü Republic Day nungtem nung o jembia sülen 6th NAP, DEF Mon, Village Guards aser 6th NAP Pipe Band temi march past agi, koba Parade Commander Asst. Commandant 6th NAP Zubenthung Ovung aser Second-in-Command API DEF Mon, Ngangpang Konyak na lenisüba kübok agia liasü.

Iba sentong nung Mantai Konyak-i guitar amshia National Anthem tema liasü aser Leangha Union Mon ajanga sobaliba tsüngsang ka sayu.

Nikongdang iba sentong nung shilem agirtem nem sempet lema agütsü aser 6th NAP Pipe Band ajanga "Beating of Retreat Ceremony" agia liasü.

Iba sentong nung MLA Mon Town, Thongwang Konyak, DG Border Affairs Rupin Sharma IPS, Deputy Commissioner, Mon, Thavaseelan K IAS aser district nung HoD tem dena sentong tali lemladaktsü.

72 BUBA REPUBLIC DAY 2021 NUNG SEMPET BALALA ANGURTEM:

Police Medal (PM) for Meritorious Service angurtem:

1. M. Rhovisie Nyuwi, NPS, Commandant, 12th NAP (IR) Bn, Chingtok Longleng.
2. Vipin Yhoshu, UBI, DEF, Mokokchung.

Republic Day 2020 nung President's Police Medal for Distinguished Service angur tenüing sangdongba:

- a) Liremo Tsopoe Lotha, IPS, IGP (TRG & Bdr) Nagaland.

- b) 1. S. Tokiumong Yim, IPS, IGP (NAP),
2. Chuba Walling, NPS, Dy. Commandant 9th NAP (IR) Bn,
3. Rishamo Philip Yanthan, UBI, DEF, Mokokchung

- c) 1. Atu Zumvi, NPS, Dy. S.P (SB), Dimapur
2. Kevisibile Angami, UBI, P.T.S, Chumukedima.

Independence Day, 2019 nung Governor's Gold Medal angurtem sangdongba:

1. T. Tsenpemo Kikon, NPS, ACP (HQ), Commissioner of Police, Dimapur
2. Noklem Konyak, Havildar, 9th NAP Bn. (IR), Saijang
3. Thungbemo Patton, NCS, Asst. Resident Commissioner (ARC) Nagaland House, Shillong.
4. Reny Wilfred, IAS, ADC, Kiphire.
5. Zeneikho Suohumvu, Head Driver, Office of the Controller of Legal Metrology & Consumer Protection (LMCP).

72 buba Republic Day, 2021 nung Governor's Gold Medal angurtem sangdongba:

1. Er. Vizotuo Seletsu E.E. PWD (R&B), South Division, Kohima.
2. Er. Talitemsu Jamir, E.E PWD (R&B), Dimapur Division.
3. Ilika Zhimomi, NCS (SDO Civil), Mon HQ

Republic Day, 2020 nung Governor's Gold Medal angurtem sangdongba:

1. M. Yambemo Humtsoe, NPS, SDPO (N), Kohima.
2. K. Thavaseelan IAS, Dy. Commissioner, Mon.
3. Thejavizo Nakhro, NCS, EAC Chumukedima.
4. Vilelie Khamo, Contractor.
5. Lemsachenlok Society, Yaongyimchen, Village, Longleng (NGO)
6. North East Initiative Development Agency (NEIDA), Nagaland, (NGO).

Independence Day, 2020 nung Governor's Commendation Certificate angurtem sangdongba:

1. B. Nellayappan, Asst. Director, Directorate of School Education, Nagaland.

2. Dr. Naieem Mustafa Mansury, IPS, DCP, Zone-1, Dimapur.

3. Imlikokba, UBSI, DEF, Mokokchung.

Republic Day 2021 nung Governor's Commendation Certificate angurtem sangdongba:

1. Y. Tumchobemo Yanthan, NPS, Addl. S.P Wokha.
2. Itokhu Sumi, ASI, CP, Dimapur.
3. Neivotuo Tsuhah, Steno Gr-1, Nagaland Legislative Assembly.
4. Athiubo Zeliang, UBSI, CP, Dimapur.

5. Mezhuvito Angami, ASI, CP, Dimapur.

6. Imnasowa, Peon, Administrative Training Institute.

7. Er. Lanuakum Ao, Jr. Er. Office of the Chief Er. PWD (NH).

8. Avino Peseyie, Graduate Teacher, GHSS, Chumukedima.

9. Lithrila Sangtam, NCS, EAC, Aboi.

10. H.A Hongnao Konyak, Social Worker, Longleng Village, Mon.

11. Vipral Tase Inspector of Excise, O/o the Asst. Commr. Of Excise (Zonal), Kohima.

Ministry of Housing & Urban Affairs GIST kübok SWACHH CITY AWARD, 2020 angurtem. (Memento & Certificate):

1. Swachh Bharat Mission (Urban) kübok Swachh Survekshan 2020 nung North-East Zone (Population Category 25-50k) atema Mokokchung district nem temerüktiba yimti naroküm agütsü.

2. Innovation & Best Practices-North - East Zone (Population Category upto to 25k) nung Pufutero-i yimti tajungtiba angu.

3. Self- Sustainable city (Based on GFC/ODF/Cost VS Revenue) North-East Zone (population category 25-50k) nung Chumukedima-i tajungtiba angu.

Ayushman Bharat- Pradhan Mantri Jan Arogya Yojana (AB-PMJAY) kübok mozü ki tajungtiba anguba:

1. 2020 küm District Hospital (DH) telemsa nung AB-PMJAY kübok Naga Hospital Authority, Kohima nem agütsü.

2. 2020 küm Community Health Centre telemsa nung AB-PMJAY kübok Health Centre, Noklak nem agütsü.

3. 2020 küm Primary Health Centre (PHC) telemsa nung AB-PMJAY kübok primary Health centre, Changlangshu nem agütsü.

4. 2020 küm atema Private Hospital telemsa nung AB-PMJAY kübok Christian Institute of Health Sciences and Research (CISHR), Dimapur nem agütsü.

R-Day nung Meghalaya Raj Bhawan indang postal stamp saya



Meghalaya governor Satya Pal Malik-i Mongulbarnü 72 buba Republic Day benjungmong nung Meghalaya indang Raj Bhawan postal stamp ka sayatsü dang agiba noksa angur. (Shillong, January 26)

Shillong, January 26 (Agencies): Mongulbarnü Meghalaya governor Satya Pal Malik-i 72 buba Republic Day benjungmong nung postal stamp ka sayatsüo. Iba postal stamp ya Meghalaya indang Raj Bhawan indang lir. Tanü Governor Malik-i Republic Day benjung nung

parade contingents repranga ao. Iba mapang Meghalaya chief minister Conrad Sangma liasü. "Raj Bhavan nung Republic Day 2021 benjung nung Governor Satya Pal Malik den külemi Shillong nung otsüsütsü Raj Bhavan indang postal stamp ka sayaogo" ta Conrad Sangma-i ashi.

72 buba Republic Day tenüng nung ozü kidang linük wako atsüketogo. Tanü anogo yagi nübor mezü ng asüba linük tenzü kba sayur. Ajak dangi Republic Day salem abener" ta paisa metetdaksü. Meghalaya sorkarisa Covid-19 wara mapang bendanga agüja inyakba frontline workers nem tenü ngsang agütsü.

NGO kati Majuli nung yimtsüng 3 adopt asü

Jorhat, January 26 (Agencies): Assam nung Brothers ta ser NGO kati Majuli nung yimtsüng asem tashi adopt süo. Brothers ya lokti atema inyakba NGO ka lir. Iba telok yagi meimchir temeten alema

Yimtsüng asemji Majuli

inyakba anema rarar. Majuli nung yimtsüng asem nung kibong 500 shi lir aser item yimtsüng adopt asüba sülen renlok daksütsü, ta Brothers tenzüker Dibyajyoti Saikia-i ashi.

kü bok Balisapori nung Selek, Selek Sessachook aser Purana Sapori lir. Sentongtem inyaka aotsü atema convenors' committee ka tentetogo aser yimtsüng asem ya model villages kümdaksütsü, ta Saikia-isa ashi.

Tripura nung tesayurtem maneni longkak aiter

Agartala, January 26 (Agencies): Hombarnü Agartala kübok Tripura education department building kima tesayurtemi tesayur ka tasü mang bener longkak ait. Tasü sangji Ajit Sutradhar liasü aser pa tekolok agi mapa meinyaki akümba (brain stroke) sülen Hombarnü asü. Pa asüba osang prokshiba sülen, yakta dang lungkak aiter tesayurtem mozüki tonga ao aser pa mang agizük. Iba mapang tesayurtemi asür Sutradhar nem akhüm agüja naro inoktsü. Sutradhar ya Nayanamura, Chandrapur tesem nungi lir aser taoba küm (2020) March ita pa tesayur mapa nungi anentsü. Lisopurtem ajanga angazükba agi, tesayur teinyakdak lia mapa nungi anentsüba ajanga sen tarulen mali kibong mesütsü atema Sutradhar kanga shisabulua liasü. Pa mapa nungi manentsü dang, küm 10 atema pai tesayur mapa inyakogo.

Lungkak aitba mapa, tesayurtemi state sorkar aser state education department anema yimyim ayimoktsü. Parnokisa, state education department indang ketdangsürtem aser security ketdangsürtem den tebang agi raratepa bangsentep. Iba sülen, tesayurtemi Battala crematorium moapu nung Sutradhar mang rongdok. Recruitment inyakyim nung aibelena/ochimashi aliba dak sendakba nung Supreme Court ajanga obendang agütsüba sülen, taoba küm (2020) March ita tesayur 10323 tashi mapa nungi anentsüo. Taoba mapang CPI(M) state sorkar ajanga 2017 küm item tesayur mapa nung aniok. Tang tashi nung, Tripura kübok mapa nungi anentsür alir tesayur 84 süo. 2018 assembly polls magidang BJP state sorkari Tripura nung parnok yimsüsüba tashi amba sülen, item tesayur

timtem reprangdanga lenmang ka adoktsütsü asoshi nangzüka liasü. Ajisüaka, tanü tashi Tripura State sorkari item tesayurtem atema kecha meinyaktsü. "Tesuiba anogo 50 tejakdang nungi onok longkak aiter. State education minister-i onok dang competitive examinations agütsütsü atema ashir, koba tangba mapang onok atema tamakoktsü," ta longkak aiter tesayur rongnung Dalia Das-i ashi. "Telok tentet balalai tesayurtem timtem atema lenmang kar bushitsütsü asoshi sorkar danga mapang shia mepishiogo, saka sorkar nungi teshimtet nübu kati danga onok den majurute p," ta Das-i ashi. Maneni, lungkak aiter tesayurtemi Tripura sorkar dang Hombarnü (25.01.2021) tashi parnok takhangba nung telangzüba agütsütsü aser ibaji mataloktsüra iba longkak aitba sentong tesashiba agütsü asoshi metetdaksüo.



Taküm Republic Day benjung nung Assam tableau ajanga süngo lu indang sayuogo. "Süngo ya alimai ajemba ka lir aser iba ya Assam den kasa lir. New Delhi nung Republic Day parade alidang Assam tableau ajanga süngo lu ayimertem sayuba atema nüma atanger" ta Assam Chief Minister Sarbananda Sonowal-i tanü metetdaksü.

Tel - 224591,230130 Fax - 03862-224591 NAGALAND HANDLOOM & HANDICRAFTS DEVELOPMENT CORPORATION LTD. (A GOVT. OF NAGALAND UNDERTAKING) Regd. Hd. Office : Dimapur - 797112 Post Box : 31		
LIST OF PARTICIPANTS FOR SPECIAL HANDLOOM EXPO 2021		
Sl/No.	Name	Address
1	M/s Ajungla	Super Market
2	M/s Akala	Full Nagarjan
3	M/s Handloom Centre	Dimapur
4	M/s Akum	Dimapur
5	M/s NHHDC Ltd.	Dimapur
6	M/s Alemia H.	Dimapur
7	M/s Sara	Kuhuboto
8	M/s Vitoli	Dimapur
9	M/s Bendilar H/Loom	East Dimapur
10	M/s Kewekhro MPCs	Enhulumi Village
11	M/s Mongmet	Dimapur
12	M/s Toheni	Dimapur
13	M/s Neikhao Konyak	Mon Town
14	M/s Phamsa Konyak	Mon Town
15	M/s Sungli Weaving Unit	Nagarjan Dimapur
16	M/s Imtikokla W/Unit	Akhoya Village
17	M/s Sademnungla	Akhoya Village
18	M/s Ajung	Half Nagarjan, Dimapur
19	M/s Ali Phom	Dimapur
20	M/s Yungli Souvenir SHG	Longleng
21	M/s Phom Laksuy SHG	Longleng
22	M/s Tohoni Ayemi H/loom Unit	Dimapur
23	M/s Progressive MPCs	Dimapur
24	M/s T. Ashom Loksuy	Longleng
25	M/s Kekhrrie	Dimapur
26	M/s Amai Konyak	Dimapur
27	M/s N. Sunita Devi	Manipur
28	M/s Chaoba Devi	Manipur
29	M/s Ayingbi Devi	Manipur
30	M/s Bijenti Chanu Devi	Manipur
31	M/s Keinhanbi Devi	Manipur
32	M/s Amir	U P
33	M/s Choimei Nyiam	Kohima
34	M/s Maoya	Dimapur
35	M/s Yumei Rupreo	Dimapur
36	M/s C. Yahoi Konyak	Mon Town
37	M/s Tovi & Roko	Dimapur
38	M/s Ethnic Crafts	Kohima
39	M/s Aosenla	Mokokchung
40	M/s Imnatila	Mokokchung
41	M/s Washimenla	Changtonya Town
42	M/s Chubanenla	Changtonya Town
43	M/s M.D. Faiz Carpets	U.P
44	M/s Aien H/loom	Dimapur
45	M/s Naga Roots	Dimapur
46	M/s Khetoli	Kuhoboto
47	M/s Bokavi	Zunheboto
48	M/s Raju	Assam
49	M/s NHHDC Ltd.	Dimapur
50	M/s Asheni	Newland

Mizoram nung kinü tanur ka auyar aoba sülen angu

Aizawl, January 26 (Agencies): Mizoram kübok Lunglei nung Deobarnep mozü ki ka nungi kinü tanur ka auyar aoba sülen kümzü kogo. Anogo 4 tain kinü tanurji Lunglei kübok Farm Veng tesem nung angu. Deobar aonung 10:30 ako meta arishi küm 40 tain tantsür ka ket nung tanurji lia angu, ta Lunglei SP Stephen Lalrinawma-i ashi. Tantsü laji Vanlalnghaki ta jangjaogo aser la ya Tlabungjila nung alir. Lai police dang tanur auyar aoba nangzüo. "La IPC nung arrla 363

kübok tai tongloktsüo. Kinü tanurji tetsü nem agütsüo" ta Lalrinawma-isa ashi. Kinü tanurji Special Newborn Care Unit nung ayutsüsa akümer ta shia Vanlalnghaki-i staff nurse ka ama anizüker ao. Lai tanur ka kanga aginüba agi kinü tanurji anir ao ta nangzü kogo. Iba kasa mozü kidang lai tanur ka mesoteti raksaa endoktsüsa aküm. Kidangi tanur ka anir mora maaksü ta bilemba agi lai tangar indang tanurji auyatsü lemtet ta Vanlalnghaki-isa police tsüng dang nangzü kogo.



TIR YIMYIM YIMOBILEM (EDITORIAL)

DIMAPUR RASEMNÜ, AENJETI (JANUARY) 27, 2021

ALUYIMERTEM ASOSHI MASÜ!

India nung taküm 2021 Republic day yabo aluyimertem longkak aitba anogo amai dang kümogo. Center government-i alu nung züsentetba chiyongtsütem ayoktsü aser alitsübaren nung ozüng tasen asem yangluba sülen aluyimertemi itemji magizüktet aser center government-ia magientet ta parnok tsünga ken o tadongi marutet, tang linük republic day amongba anogo dena topur mejungi tembangogo. Atangji, center government-i latetba ozüng tasen jagi aluyimertem nem tajangzük tuluba agütsütsü ama aikati bilemer, kechiyong iba ozüng tasenba ajanga aluyimertemi parnok lu nung züsentetba chiyongtsütemji, kecha talenba melii, shirnok dang yoknüdir, parnok dangji ayoktsü melar. Tetezü tayoker o talir na tsünga shinga maitdaksüi indangindanga shishiteptsü lenmang lapoktsür. Ajisüaka, aluyimertemi iba jagi parnok kanga akoksatsütsü amai bilemer, anungji magizüker. Atangji, ozüngji, shinga atema masü, aluyimertem asoshi lir, anungji aluyimertemi magizükba tetezüji parnok asoshi ozüng tasenbaji majung asütsü. Tanü lima yimten yimsüsübaren nung bilemdangtsüba mapa kaji, aluyimba nung dang masü saka wadang balala nung mapa inyakterem asoshi tatar yimsüsürtemi ozüng lateter, kechiyong parnokji ozüng yanglurtem lir, saka parnokji aluyimertem masü, anungji aluyimertem kechi nüngdaker aser koma timatemer, itemji tatartem jagi majangshidang nungji memeteter, anungji kechi ozüng latetdir latetaka, tatartemi mapa inyakterem den shisalemsatepa latettsü nüngdaker. Tang alu nung züsentetba jangotsü ayoktsü asoshi latetba ozüng tasenji aluyimertemi agientsü akanger saka center government nung alirtemi magientsü tekong meranger ta, tang tashi nung parnok tsünga tukuben senden liogo saka telemtetba kati marutet kangshiteper. Tang tesüsa government-i telemtetba agibaji, aluyimertem asoshi latetba ozüng tasenji taruba ita 18 tashi mamshii atatsü lateta lir saka ibajia aluyimertemi magizüker. Aluyimertemi akangbaji ozüng tasen asempronglaji kenyonji agientsüla ta akanger. Iba nung jagi parnoki masetshir aser masetshitsü ta metetdakja lir. Ibayongji, republic day nung dena longkak aittsü mulungtet. Atangji, tang longkak aiter aluyimertem ya linük ajaklen nungibo masü saka Punjab aser Haryana state nungi lir, ajisüaka parnokiang India rangben mesür. Parnok yabo joko ita ana tashi parnok lima toktsür aruagi Delhi artsü nung longkak aita amonger aser ozüng tasenba ya magien tashi meyipa maotsü tebilemba lir. Iba ama tia ka nung Narendra Modi-i aniba government asoshi kanga shisadanga telemtetba tajung ka magitetra, ano aluyimertemi February ka nübo tetsüng agi Redfort tashi oa adenshitsü telemtetba lir. Kechi ozüng latetdir latetaka, nübortem ajungtsü asoshi latetter, anungji tatar senden nung ozüng tasen latetbaji nübortemi magizüktetra ozüng yanglurtemi bilemdangtsüla. Atangji, tatar senden nung ozüng ka latetli, aji mapa küma inyaka maodang agienli ta asütsübaji majung aser maksü angur amato bilemer. Ajisüaka, tatar senden nung nübortem ajangzükdaksütsü latetba ozüng ka nübortem madak tashiyim amshia inyaktsübaji langkoshishi mapa asütsü. Nübortem ajungtsü asoshi latetba ozüng süra, nübortemi pelatepa agizüksüla. Aji oda, aluyimertem ajungtsü atema latetba ozüng süra, aji aluyimertemi pelashishia agizüksü. Ajisüaka, nübortemi magizüktera, aji nübortem asoshi majung asütsü. Iba tangatetba nung center sorkari ozüng tasenbaji agienang shitak asütsü. Atangji, India-i Covid wara nokdangtsü asoshi mozü kanga karaa yangluteta alemba agi ajak nümadangtetter, ajisüaka ano Covid wara tongpang teraradak nung India ajunga mesüba aluyimertem adenshia linük yimtiba nung longkak aitbaji tebilemdangtsü tuluka lir. Ozüngbo aluyimertem asoshi yanglu saka aluyimertemi maginür aser government-i kechisüdirsüaka agitsüla ta tekongmeranger ta süra, ozüngji aluyimertem asoshi masü saka aluyimertemi züsentetbatem alizüka ayoktsü purtem asoshi latettsüba ozüng asütsüa akok.

OLEMSABANG NAGA YIMDEN LATET NUNG TETSÜR TANGATETBA

~ O. Shiluienla Jamir

Tanü Naga yimden latet nung tebilemtsü tulutibaji “Politics of exclusion and erasure” (jendokba, maniokba aser aidokba) ya asütsü ta bilemer. Kin ka-ana lenisüba nung dang bener odi ta asüba. Aroki shilem agia aruba otsü samadaksütsü merangba aser tebur lenisüba nung dang odi asüba ya tebilemtsü tulu.

Naga nunger lokti, yimden aser arogo nung “politics of exclusion”, tetsür metendaksüba ya jangja jangja dang angur. Ibai ochi mashi tera tulutiba ka ta angatettsüla. Tanü asenoki Naga society yanglushitsüba aser nüjiso indangbo jembir, saka tetsür atsüngina yutsüba ochi mashi indangbo mejembir. Koda sür 50 % nütsüng tebilemba ola magir, shilem magütsür? Iba ochi mashi sobalibaji memelenshi, Naga yimden latet indang jembitsü? Iba “culture of exclusion and erasure” ajaki aroka bilemdangtsü kanga tongtibang ta bilemer.

Nüjiso latet atema bilemdang asenoki aiben “we look at the other, at the external factors, often without realizing that we are the ones contributing to the arrest or stunting of our very own liberation.” Anungji, yangi ni asen Naga nunger tashi mait ka dang lemsar.

Tetsürtem, tetsür asüba yong parnok ola, parnok tebilemba magili, parnok shisatsüji shisatsü masü ama mezüngoker. Iba tang ya “epistemic silencing” ta ajar. Yimya agi asenoki tetsür anema tashiyim mapa ta asüba nungji tetsür dak azükba ta dang bilemer, saka tetsür mezüngokba, jendokba yaa tashiyim mapa ta angatettsüla. Gayatri Spivak ‘epistemic violence’ ta asüba nungji nisung kar ola aser tebilemba magitettsüsa jendokba dangji ajar ta ashir. Naga nunger lokti nung ya koma angatettsü? Yimtsüng nung election mapang, Senso Mungdang ka ayongzuka, iba candidateji senso candidate asütsü ta lemtetba. Aser iba Senso Mungdang nungji shirnoksa tendaktsür ta süra, teburtem tang asür. Tetsür maten (50 % population) koda süba ibala telemtetba agitet. Iba dangji “Telemtetba agidangbo medendaktsür, saka tashiyim agi telemtetba inyakdaksüba” ta angatettsüla. Tetezü, tetsürtemji senso nung maten ta jendokba, yimtsüng senso, yimden nungji tetsür shilem mali. Iba dangji “silenced and erased” ta ashir. Naga Hoho, Ao Senden ajak nung tetsür ola mali. Naga yimden nüjiso bushiba latet nunga tetsür ola mali. Telok kati dang, tebur dang, Naga yimden latet indang telemtetba agitsü makok. Naga nunger tarutsü indangji tebur kisüng indang masü. Anungji tetsür ola, parnoki kechi aginer aser tebilemba aji angatsü nungdak. Anungji Naga nung tebur arakmoa akaba lokti tentet nung tetsür ola adoktsü memelaba, parnoki ashiba angdangtsü lemanng melapoktsüba, jembitsü memelaba ajak dang ya tashiyim mapa ta angatetdi. Ya melenshitsü nungdak.

Tanabuba nung, tetsürtemi jembiakasa parnoki ashibaji aroka magizüker, mangli asür, aiben tetsür-tanur kechi ta temulung agüja mangar. Miranda Fricker-i iba dang ya Testimonial Injustice (taküm kuli ashitsü memelaba ochi mashi inyakyim) ta ajar. Tetsürji, tetsür-tanur ka (tetezü tebur kolok memenep ta bilemba) aser tetsür-tanuri ashiba nungji tagitsü malija, anungji lai shiba oji lokti nung benoka jembitsü nungdak mali ta angatetba. Iba dang ontological and epistemological violence ta ajar. Tetsür asüba yong laji mezüngoker; tetsür asübayong la shisatsü tajung aser tebilemba temulung agüja mangar. Tanü Naga nunger lokti nung kasaji “tetsür-tanur kechi” ta ilaa, luja repringba aser benshiba angur. Iba mulungsentsü nung Naga yimden latet agitsü nungdak mali.

Kechiba tetsür nem shilem magütsüner? Kechiba tetsür ola jendoker? Tetsür-tanur ta jembia nütsüng tesadang ka tebur kübok azüoka ayuba aser tim shilem magütsüba ya ochi mashi tulutiba lir ta ajaki shitettsüla. Tebur atsünga yangluba sobaliba kisüng agi alima kodanga tejakleni maotsü. Naga nunger tejakleni motetba kaji tetsür jendokba ajanga lir ta angatetdi.

Ano tementettsü kaji ya: Tebur yimli kübok azüoka ayutsü asoshi tebur atsünga sobaliba yanglur aji amshia tetsür atsüngzuka tezü nung yutsür. “Culture is used as the rationality to defend any encroachment on men’s rights and power.” Ano külen tebur yangluba sobalibaji shitak ta tetsür nema amangdaksür aser mulungsentsü menetsüba ajanga, tetsütemia tetsür shilemji kibong nung dang, yimden maparen ya tebur mapa ta bilemer. Tebur yangluba sobaliba dak ajemdaker 33% municipal election reservation magizükli asür, tatashim nunga tetsür nomination filed süra withdraw süang, madoktsü aser meyongnem magütsütsü ta sendoker. Tebur yimli, yimsüsüba mendenbo tetsür nem agüja maru aser magütsütsü ta neyongnem (vote) magütsür. Sobaliba kümzuka ayutsü asoshi ta tetsür lokti yimden yangerba nung shilem magütsüba angur. Kasaji Naga yimden latet bushiba nung Naga Mother Association lenir kari azüdokshiba mapa yimjung ola adokba dak alaka, Naga yimden latet nung tebilemba ola mali aser magütsür.

Tetsür nem yimden tashi magütsübaji ochi mashi mapa ta angatettsüla. Tebur sobaliba ya arogo nunga benokba ajanga tetsür nem arogo nung tim shilem magütsür. Pastor ya tebur mapa amai dang bilemer, mungdang nung, sempet aser degree tajung akar tetsür aika liaka, lenisüba menden magütsür. Arogo ta asübaji tambur ishikati telemtetba agia anir telok ka kümogo. Tanü tetsür-tebur tebandang mali lokti ajak ajungtsü inyaktsü nungdak. Arogo nungi temelenshiji tenzüktsüla.

Naga yimdenji tebur kisüng asoshi dang masü. Tetsür, tebur, lanur ajak dena lir. Ajak kasa shilem kar. Naga yimden nüjiso küm aika jembia aser raraa arur, saka tanü tashi terata nung dang lir. Tanü tashi tetsür ola mali aser tetsürtem nem shilem magütsür. Tetsürtemi Naga yimden latet nung kechi aginer ta süra tetsür o tebur tebandang mali, (tetsür tajemba jenjang yutsüba ya indoker), tebur dang tekolak ta tanagetetba masü, nübur ajak kasa senso tajung kaka aser ochi nung noktakba yimden yanger ka latettsü aginer. “Culture of exclusion” ya memelenshi nungbo tetsür atema nüjiso jenjang maka. Lai tesayuba temendakdakji tetsür-tebur ajak nüjiso, ajak tekümtet taasüba ya lir. Iba “inclusive” aser “justice” nung ajemdaker Naga yimden latet bushitsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Ethiopia kübok Tigray region nung Khristan 900 dak tema tepset



Ethiopia nung akhidang lung agi chitetba Tenla ki ka noksa nung angur.

Aenjeti/January 26, 2021: Ethiopia linük kübok Tigray region nung Arogotem aika amakba mapang nung putirtem aser Arogo lenirtem densema nisung 900 dak tema tepsetogo, ta osang ka ajanga metetdaksü.

Tan ita tetenzüklen-a Belgium nung aliba non-profit organisation - European External Programme with Africa teloki, Ethiopia kübok Aksum nung aliba Orthodox Maryam Tsiyon Arogo Tenla ki amakdang Tenla kidang nungi nisung 750 aniteter khaset, ta metetdakja liasü.

Christian charity telokAid to the Church in Need (ACN) den jembidang nisung kati, "Iba Tenla kidangji nisung 1,000 shi liasü. Nisung 750 tepset aser aika yirua liasü," ta metetdaksü.

"Aksum yimti nung ozüng süngden lir, anungji ozüng süngden kümzüksü atema tamangertem Tenla kidangji adenshi asütsüa akok. Parnok Tenla kidang nungjagi kimai

anitetba sülen khaset," ta nisungba jagisa metetdaksü.

Yaküm November ita nung Tigray Peoples' Liberation Front (TPLF) aser Ethiopia nung Nobel-prize winner angusang Ato kilonser Abiy Ahmed-i aniba sorkar sepaitem na tsüngda rara tenzüka liasü. Sorkar anati ka aitsütepa arudar.

ACN-i ashiba agi, yimtenren tsütsü rara adokba ajanga Khristantem aser Muslim nung er aika süogo, ajisüaka iba rara ya tamangba yimsü den sendaktepa mali.

"Tetenzük nungi Eritrea sepaitemi iba tongbang nung shilem agir. Sorkaribo ibaji menangzüker saka Tigray anüdoklen aser anüolen nisung jenti tepsetertemji Eritrea nung er sepaitem ajanga lir," ta kasa osang ajanga metetdaksü.

Iba rara ajangasa Tenla kitem aser mosque rongdoktsüdang mesüra raksatsüdang Aso 13buba

mapang nungi amshia rizüngba kaket ken o aika rongdokogo.

University of Hamburg nung Centre for Ethiopian & Eritrean studies-i item tatalokba atema tebilemtsü kaa lemsatepogo. Parnoki shidi ka ajanga, "Tigray nung aliba Tenla kitem aser temeshi kiojentem nungi auyaba kaket ken otemji kobi melii Ethiopia nungi miima bener aoba sülen tanga linüktem nung aliba antiquities markets nung yokadoktsü," ta metetdaksü.

"Onoki külem tenzükertem dang sobaliba kiojentem kümzüka ayutsü asoshi amalitepa inyakdaksüner," ta parnokisa metetdaksü.

Aksum yimti nung Maryam Dengelat Arogo Tenla ki, Dabra Abbay monastery, Dabra Dammo monastery aser Mary Cathedral Arogo Tenla kitema lendong ajurutsüsa lir.

Aksum yimti ya UNESCO World Heritage List nung züngoka lir.

Nepal nung Khristantem tang tamajungba reshikangshir

January 26, 2021: Hindu nung er nütsüng timba aliba linük- Nepal nung Khristan nütsüng renlokdar, ajisüaka iba linük nung Khristantem ano tang tamajungba reshikangshidar, ta International Christian Concern (ICC) osang ajanga metetdaksü.

Tawa Global Press Journal-i lemsatepba ocet ka nung Pastor Hari Tamang-i reshikangshi ajangshiba indang shia lir.

Nepal nung Pastor Tamang-i tanurtem shibelener aser Khristan tamangba yimsü dangi meyipdaksür, ta tiyazü nung pa nem tai tongloktsü. Tsürabur malir tanurtem kima yimdong nung alir, aser pai item ama tanurtemji yaritsü atema melunga liasü. Pai tanurtemji shibelener, ta pa anema benokba ken o bo

agienogo, ajisüaka pai kangshia tamangba yimsü meyipdaksür ta tai tongloktsüba ken o bo tang tashi magien.

Nepal nung er ozüng nung pei tamangba yimsü sadoka beshitsü melar, ajisüaka tangar tamangba yimsü meyipdaksübabo ozüng alema lir.

Nepal nung Khristantemi ashiba agi, Yisu Khristai Pa sülen anidakertem dang pei tamangba yimsüji tangar den-a lemsatepang ta ashir, ajisüaka Yisu sülen anidaksüjibo pei melung, anungji onoki Khristan yimsü dangi meyipdaksütsü atema shinga mekangshir.

Ajisüaka Hindu nungertemi, Khristantemi tangartem kangshia Khristan yimsü dangi meyipdaksür, ta

tai tonglokja arudar.

Yamaji Pastor Tamang nem-a kasa tai tonglokja pa anema ken o benoka lir.

Nepal nung Khristan nütsüng renlokba mapang nung ibaji nokdangtsü atema Khristantem anema inyakba tali bulua akümer.

ACN-i ashiba agi, tang Nepal nung Khristan nütsüng million 2-3 tsüngda lir aser Arogo 10,000 nungi 12,000 tsüngda lir.

Nepal nung Arogotemi timtembapurtem nem teyari balala agütsür, ajisüaka Hindu nungertemibo Khristantemi ibaji Khristan yimsü dangi meyipdaksütsü atema inyaker ama temelung malemer.

Ajisüaka Arogoi maneni item ama mission mapa inyaker aser pei tamangba yimsü indang tangar den lemsateper.

ANOGO ABEN TSÜNGREM DEN

Pa tenüngtem

Mark 9:38

Tema reprangtsübo Yisu nütsüngtem Pa tenzükba mapa kümdanga anükbaji, junger ama repranger. Parnoki parnok telok nung matenba kari temenen tanelatem aridokba angu, aser aji nungtemtsü Yisu dang ashi. Aji saka Yisui nütsüngtem anemsü ajanga angu. Nütsüngtem nem temenen tanelatem aridoktsü ain agütsü (Matt. 10:8) saka parnoki tamakok angu (Mark 9:28).

Tanür ka nungi nütsüngtemi temenen tanela maritoktetba atema parnok yimjak nung koda mak sür alitsü. Saka yangi karibo shirnok Yisu den tetibo malir parnoki takok ngua temenen tanelatem aridokba angur. Parnoki tanela ainji parnok tia aser parnok taküm aliba tashi ta bilema alitsü. Parnok Kibubai arütsüba agi parnok tamang nung tashi maitba parnoki angatetter alitsü (Matt. 17:20). Iba melen parnoki tangar dak ranglok. Parnok temenen nungi temulung meyiptsü melen aser parnok tanela nung tashi miti aliba atema jashitsü melen, shirnok tanelaren takok nung pelaa liasü parnok noktangtsü nütsüngtemi merang.

Sri Lanka nung Easter anogo nung Tenla ki amakdang asürtem bilemtet



Sri Lanka nung 2019 küm April 21, Easter Sunday anogo nung St. Sebastian Arogo Tenla kidang bomb lendong atalokba sülen tangokba noksa nung angur.

January 26, 2021: Union of Catholic Asia News (UCAN)-i ashiba agi, Sri Lanka nung aliba St. Sebastian Arogoi 2019 küm Easter anogo nung bomb amshia Tenla ki amakdang asürtem bilemteta sentong ka agiogo.

Amongnü (January 24, 2021) Tenla kidang candles tsükloka 2019 küm bomb amshia S. Sebastian Arogo Tenla ki amakba lendong nung asürtem bilemteta sarasadem.

2019 kümApril 21 nü Easter Sunday anogo nung pei taküm tenla agüja temang nung bomb alenloker Tenla ki asem den luxury hotels amakdang Khristantem timba ser nisung 350 dak tema asü. Iba lendong ya IS kiralongrartemi lir ta parnok sasa nangzüka liasü.

Kiralongrartemi amakba Tenla ki asem rongnung St. Sebastian Arogo Tenla ki densema lir. Easter Sunday anogo nungji Tenla kidang tamangertem aika liasü.

2019 küm iba Tenla ki amakba sülen nungibo army aser police-i security agüja tekülem sentongtem agia arudar.

Tawa Sri Lanka nung aliba court asem-i Easter anogo nung bomb lendong agütsüba den sendaktepa alir nisung 10 chiokogo. Parnok chiokba atema mepelai Khristantemi, parnok chiokba ajanga iba lendong nung asürtem nem ochi temeden magütsür, ta ashi.

UCAN den jembidang Negombo nung tesayur ka tenüng agi, Nuwangi-i, "Easter Sunday anogo nung bomb amshia amakba dak sendakba tang bushisüngdang tesüdak mapang ka nung melung melemteti pua alirtem chiokba ajanga Khristantem mepelar," ta metetdaksü.

Nuwangi-isa, "Iba ken o nung nija kuli bushitsüla aser takoksa angur kibongtem nem ochi temeden agütsütsü atema aibelenertem nem temerenshi agütsütsüla," ta metetdaksü.

OLONG PAITEP # 5706

1		2			3		4			5
				6		7				
8										
						9				
			10							
11										12
					13			14		
15										
16								17		

TIPIEN

1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 5705 TELANGZÜBA

TIPIEN :


1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon, 4. Aso,
6. Nile, 9. Alizüng, 10. Omen,
11. Lemta, 13. Ola, 14. Kin.



TESAYURI ALOKBAR CLASS TENDANGER :



- Tesayur** : Sobangbai Maths spelling shiang.
- Sobangba** : M-A-T-H-S, maths.
- Tesayur** : Very good, süra Alokba Maths full form nung shiangjung.
- Alokba** : Sir, ni English nung dang shidi ni?
- Tesayur** : Ok, shiang.
- Alokba** : Mentally Affected Teacher Harrassing Students.
- Teacher** : Arree, Alok na shitak südi?

Lilir : WhatsApp

TANÜBO NAI LANGZÜANG

Q. Shirnoki International Migration 2020 Highlights report saya?

A.GoI B.UK C.UN D.USA

===== (Taruba adok nung onoki langzütsü)

YASHI ADOK TELANGZÜBA : 1975

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

1. Tenüng :
2. Tasoba anogo :
3. Küm : 4. Class :
5. School :
6. Talidak :
7. Salem osang :

Tepela Tasoba Anogo



NAI-A YA METETTER MA?

JANUARY 27 NÜ ATALOKBA KAR:

- 98 AD** - Nerva asüba sülen Trajan ya Roman Emperor aküm.
- 1556** - 'William of Orange' ya Order of the Golden Fleece indang Knight aküm.
- 1778** - Paris nung Piccinni indang opera - "Roland" saya.
- 1886** - Salisbury indang mezüng British sorkar anen.
- 1891** - Mount Pleasant Pennsylvania kübok mine apokba lendong nung nisung 109 asü.
- 1894** - Golden Gate Park nung Midwinter Fair lapok.
- 1905** - France nung Maurice Rouvier-i sorkar tentet.
- 1909** - Norway nung 'The Young Left' ngutet.
- 1918** - Broadway Theater nung mezüng Tarzan film - "Tarzan of the Apes" sayu.
- 1926** - US Senate-i World Court nung adentsü mulungtep.
- 1976** - Viv Richards-i pa indang mezüngbuba Test century yanglu.
- 1984** - John Lennon aser Yoko Ono nati "Milk & Honey" kensep saya.
- 2013** - Chess Grandmaster, Magnus Carlsen-i 2013 Tata Steel Chess Tournament takok angu.

SUDOKU # 5747

4		7	6	3	2			
6	1	8		7	9		3	4
	3	2		4	1		6	
			3	8		1		
				4	8	5	3	
8	4		1	7				
	2			5				
		4				7	1	
		5	4	9	8	3	6	2

TELANGZUBA # 5746

7	1	3	9	2	8	6	5	4
5	9	6	1	7	4	8	3	2
2	8	4	6	5	3	7	9	1
8	4	9	7	3	2	1	6	5
1	3	2	5	8	6	9	4	7
6	5	7	4	9	1	2	8	3
3	6	8	2	1	5	4	7	9
9	2	5	8	4	7	3	1	6
4	7	1	3	6	9	5	2	8

OJANG LUTEP # 5294

- ZÜNTEMG** :
- AIBNEELERJI** :
- HIABUS** :
- OEMAR** :
- KASA** :
- AINERBELEJI** :
- MZÜTENG** :
- OKIKÜB** :
- DANAITG** :
- ÜRAITS** :

OJANG LUTEP TELANGZÜBA # 5293

TAKAR TEKORO KATI SENSAKER DANG PEIANG TOKORONGBA
ASER TIMTEMBA SAYUTET

TAN HOPTA ATEMA - KOMA SÜLA ?

Q. Nagaland nung ya Assembly constituency 40 dang aküm nunga süla ?

Olong 29 shi nung January 22, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.

Tractor rally: Shah-i tensa asadangtsü atema senden ayong



New Delhi nung 72buba Republic Day amungdang, Centre-i yangluba aluyimba ozüing anema longkak aitba sentong; 'Kisan Gantantra Parade' nung shilem agiba mapang aluyimertemi Ghazipur arrtsü anasa tenokdangba agütsür aliba rakpoksü merangba noksa nung angur.

New Delhi, Aenjeti/January 26 (Agencies): Linük yimtiba nung aluyimertem rally mapang tesem aika nung mangatetep adokba sülen tensa asadangtsü atema Union minister Amit Shah-i, Delhi police aser home ministry ketdangsürtem den senden ayongzüka menogo. Aluyimertemi aluyimba ozüing asem agintsü khanga linük Republic Day amungba anogo

tractor rally ka ayongzüka agia liasü.

Union home secretary Ajay Bhalla-i Shah den ajurutepe linük yimtiba nung tensa indang metetdaksüba den tensa azüoktsü atema Delhi police-i jenjang agibatem indang metetdaksü, ta ketdangsür kati PTI dang ashi.

Aluyimertem aser police tem tsüingda mangatetep

adoker aliba mapang iba senden menogo. Mangatetep adokba mapang tractor ka meküpa aluyimer ka asüba osang ajanga metetdaksüogo. Kasa mapang nung police tema aika yirua mozüki-i anirogo.

Mongolbarnüsa home ministry-i, nüburtem kümzüka toktsütsü atema Delhi kübok tesem pongu nung ghonda 12 internet service shibanga

toktsütsü tetuyuba agütsüogo. Delhi kübok Singhu, Ghazipur, Tikri, Mukarba Chowk aser Nangloi tesem nung telecom services shibanga toktsüba den item tesem atonga aliba tesemtem nunga internet service shibangtsüogo.

Aam Aadmi Party (AAP)-i azütokshi inyakyim aitsü:

Iba talokba sülen AAp shirnoki, Centre indang aluyimba ozüing asem anema longkak aita aliba aluyimertem pusema aruogo, parnoki Mongolbarnü mepetmesü adokdaksüba atema aitsüogo aser kasa mapang nung Delhi nung temzüing ozüing tamajungba kümduksüba atema Centre sorkar aitsü.

AAP sangdong ka ajanga, iba azütokshi inyakyim ajanga aluyimertem longkak aitba sentong tashimeiti kümduksüogo, ta ashi.

"Onoki tanü longkak aitba yimya aitsür. Centre sorkari tensa mazüokteti iba tashi timtem adokdaksüba ya tesasatsüka. Iba inyakyim ta taoba ita ana tashi yimjung nung dang agia arua liasü," ta party sangdong ka ajanga ashi.

"Aluyimer lokti tentet lenirtemi ashiba agi, tanü

mepetmesü adokba nung densema alirtem ya iba inyakyim nung dena alirtem masü. Item nisungtemji shirnok südir süang, iba ajanga inyakyim tashimait kümduksüogo, koba yimjung nungdang agia arua liasü," ta AAP-i ashi.

Azütokshiba ajanga telangzüba mangutsü: Rahul Gandhi

Aluyimertem aser police tem tsüingda linük yimtiba kübok tesem balala nung mangatetep adokba mapang Congress lenir Rahul Gandhi-i Mongolbarnü, azütokshi ajanga tebilemtsü kecha mebentetsütsü, ta ashiba den linük ajangzüksü atema aluyimba ozüing asem ya agintsü khangogo.

Gandhi-i Twitter ajanga, nisung kar danga yirura iba ajanga linük dak kongshitsü, ta ashi.

"Azütokshiba ajanga tebilemtsü kecha mebentetsütsü. Nisung kar danga yirura iba ajanga linük akoksatsü. Linük ajangzüksü atema iba anti-agricultural ozüingtem aginang," ta pai Hindi nung tweet asü.

(Maneni tapak 10 nung...)

Haryana: 'Mhara Gaon-Jagmag Gaon' scheme nung yimtsü 23züngoksemogo

Chandigarh, Aenjeti/January 26 (Agencies): Haryana Chief Minister Manohar Lal Khattar-i Mongolbarnü 'Mhara Gaon-agmag Gaon' scheme nung yimtsüing 223 talila b e n d e n l o k s e m a metetdaksüogo. Item yimtsüingtem nung tanen makai power supply agütsütsü.

Item yimtsüingtem nung tanü nungi tenzüka ghonda 24 power supply angutsü, ta Khattar-i Panchkula nung Republic Day amungba mapang ashi.

Iba scheme nung yimtsüing 223 talila bendenlokba sülen tang tashi nung scheme kübok yimtsüing 5,223 kümogo.

Chief minister-i, "tang

yimtsüing 1,500 shi nung anogo nung ghonda 16 nungi 21 tashi electricity supply angur aser yakta item yimtsüingtem nunga anogo nung ghonda 24 power supply agütsütsü," ta ashi

R-Day nü Khattar-i war memorial nung naro tokja rara nung pei taküm bendanga agütsürtem nem tetushi agütsü. Paisa, Indo-Tibetan Border Police Force, Haryana Police aser National Cadet Corps contingent tem indang parade asadanga liasü.

CM-i, pei taküm bendanga agütsürtem linüki teti bilemtetstü, ta ashi.

Covid-19 indang jembidang pai, alima, linük aser state-i mapang tamajung ka

ajangshiogo, ta ashi.

Wara den rara nung India-i tejakdang ser aniba ya nümadangtsü maparen ka lir, kechiyong linük nung scientists temi Covid-19 vaccines ana yanglutetogo, ta Khattar-i ashiba den January 16 nü vaccine agütsüba sentong amenokba sülen anogo ter tsüingda nisung lakh 10 nem vaccine agütsüogo, ta ashi.

"Haryana nunga vaccine agütsüba sentong tulu ka ayongzüker agidar aser tang tashi nung nisung lakh 1.05 nem vaccine agütsüogo," ta pai ashi.

Maneni pai state nung sorkari sentong balal benoka inyakba nung takok angubatam indang lokti den lemsatepa liasü.



Republic Day nü New Delhi nung Assam state indang tableau, Rajpath adena aoba noksa nung angur.

Opposition lenir-i Goa CM aitsü

Panaji, Aenjeti/January 26 (Agencies): Hombarnü Goa Anghi assembly nung mezüingbuba ojembiba mapang opposition züingsemtemi sü tanak mesür placard tem sayuba Goa Chief Minister Pramod Sawant-i magizükba sülen Oppositon lenir Digambar Kamat-i pa aitsüogo.

Aleixo Lourenco, Vijai Sardesai aser Rohan Khaunte densema Opposition MLA temi placard tem amer longkak ait, ajisüaka Goa aser Maharashtra Angh B S Koshyari-i pa temang nung timtem lir ta shia o tatsüka dang jembiba ajanga parnok tebilemba ajungabo matalok.

"Assembly mezüingbuba anogo opposition temi Angh Bhagat Singh Koshyari anema tim masüba inyakyim benshiogo. Opposition-i parnok mapa lepa reprangshia democratic values tem ajungkettsü merangtsüla aser nüburtem ajangzüksü

atema inyaktsüla," ta Sawant-i ashi.

Iba olen dak sendakba nung Kamat-i Twitter ajanga pa aitsüogo. "Sorkari nüburtem tejangraba angatsüla aser nübutem atema nokdaksüji Opposition mapa lir. Inyakyim karbo meyipa agütsübatem lir. Sorkari mapang tatsüba kümduksütsü mebushi Opposition den tatsü talang atsütepa jembitsü atema tasü ita aliba sayutsüla," ta ashi.

Taoba küm pongu tsüingda nisung aika party melenshiba ajanga Goa Legislative Assembly nung opposition tashi kanga ajema kümogo. Parnoki ashiba agi, Goa sorkari parnoki ola adokba kecha masadangi temsepa toktsütsü meranger ta shi ola adoka arudar.

"Sorkari tanungba opposition tera ya tsübura parnok shidakba kanga tsübur," ta Goa Forward Party lenir Vijai Sardesai-i ashi.



Rajpath boulevard nung India Republic Day amungba mapang government Biotechnology department indang Tableau nung COVID 19 vaccine sayaba noksa nung angur.



Indian Ambassador to China, Vikram Misri-i China yimtiba, Beijing nung aliba Indian Embassy nung Republic Day nüngtem nung India linük nisang asongba mapang tangokba noksa nung angur.

Biden-i Europe nungi arurtem tanaben nokdangshir

Washington, Aenjeti/January 26 (Agencies): Taoba US Tir Donald Trump indang sentongtem melenshija, Hombarnü Tir Joe Biden-i Europe aser Brazil nungi senzüsempongertem tanaben nokdangshiogo. South Africa nunga coronavirus tabu tasen ka poktetba mechi iba linük nungi US-i aitba White House ajanga nokdanga liasü.

COVID-19 aser medical team den shisa lemsatepba sülen Tir-i iba mera ya agir, ta White House Press Secretary Jen Psaki-i osangbener dang ashi.

Taoba mapang European Schengen area, the United Kingdom, Republic of Ireland aser Brazil linüktem nem tenokdangba agüja aliba Tir Biden-i magiener, ta Psaki-i ashi. Tashidak wara tamajungba akumba mapang aser ano tabu tasen aser tesashiba ka prokchia aoba ajanga tang bendang linük nungi arutsü nokdanga aliba agentsü mapang masü, ta Psaki-i ashi.

"Aser ano kanga temelaba nung menatepa aoba virus tabu tasenba, B1351 mechi South Africa-a iba tenokdangba list nung inoksemogo," ta lai ashi.

Iba den bendenloksema January 26 nü nungi tenzüka bendang lima nungi United States-i arurtemi parnok ayamesotsü anogo asem lia airlines nem coronavirus tashidak maliba kuli agütsütsüla, ta laisa ashi.

Ibai senso mesüra senso masür ajak dak kongshitsü, ta lai ashi. US senso temi tongtipang masüba nung bendanglen senzütsü sentong aliba khen bilemdangshitsüla, ta State Department-ia shia lir.

Iba totuyuba agütsüba sülen bendanglen senzütsüsa akumertemi senzüsempongtsü tenokdangba ya khen kanga junga shisadangtsüla. COVID-19 adokdaksüba virus agi meneper nisung aika parnok dak iba tashidak aliba memetet virus ya bener senzür. Nüdak iba tashidak aliba jangjatetra na bilemba ama kidangi meyipa meshilangtettsü. Na hopta aika

kidangi marutettsüsa kumra na kechi inyaksü? Na kong alitsü? Na dangalen alitsü atema senotsü komaser bendentsü, ta ashi.

Tasüngdangba ka langzüba mapang, Trump-i tenokdangba agütsüba den balala, ta Psaki-i langzü. Ibai tangatetba meshidak amai nibo angateter. Muslim nung nokdangba ya danga linük sempaba amai angateter, ta tiri jangja jangja shia lir. Pai Muslim nung nokdangba melenshitsu. Item mera agitsü ya pa tenangzüktep magidang yongi bilema liasü. Ibai pa indang sentong nung shilem ka lir, ta lai ashi.

Taoba tiri senzüsemponger nem kisung tenokdangba agütsür linük nung aliba nüburtemi mera magiba atema pai jembidena aru. Iba mapang aser tawa pai mask agitsü, anogo 100 nung America nung million 100 nem mozü tuloktsütsü atema mozü alemtsü asoshi senotsü agütsütsü atema jembia aru, ta Psaki-isa ashi.

Dutch Police-i ozüing raksar 150 dak tema apu

Amsterdam, Aenjeti/January 26 (Agencies): Netherlands kübok tesem balala nung curfew benoker tasem aonung tashi nung police temi ozüing raksartem nisung 150 dak tema puogo. Coronavirus tashidak menatepa aoba nokdangtsü atema aonung curfew benokba sülen ozüing raksartem store tem rakpoka auyuba den long ona aser mi senokja yimtittem mesüngjemteti lir.

National Institute for Health (RIVM)-i, England nung tashidak tapu tasen ka poktetba indang tekümdaktsü metetdaksüba sülen

Netherlands nung Alima rara tanabuba sülen tang mezüngbuba curfew benoka lir. Hopta tsüngda tashidak menatepa aoba tajemba kümaka ketdangsürtemi iba tenokdangba agütsüogo.

Rotterdam yimti nung police ter yiruogo aser manger mesangwa tsüngda ozüing raksartem 60 puogo, ta Dutch news agency ANP-i Mongobarnü metetdaksü.

Kasa mapang nung noksa tangoker ana; ka linük yimtiba Amsterdam aser ka kidanger yimti Haarlem nung long aonertemi yirutsüogo, ta broadcaster NH Nieuws-i

metetdaksü.

Linük yimtiba anüdoklen police den mangatettep adokba sülen nisung teku tashi puogo. Yimti nung store tem indang kichiba onsatsüba den nisung telok kati police indang gari ka amak, ta tenük kuli agütsürtem ashi.

December tom nungi school aser non-essential shops tem ajak shibanga lir. Iba masüdag ita ana jakdang bar aser restaurant tembo shibangtsür liasü.

Netherlands nung tashidak agi asür 13,579 jungogo aser tang tashi nung nisung 952,950 dak tashidak poteta lir.

China-i south China tzyim-i warship tem yok

Beijing, Aenjeti/January 26 (Agencies): US-i aircraft carrier telok ka yokba sülen China-i Mongolbarnü South China tzyim-i amphibious ka densema navy drill atema raradang amshiba rongtem yokogo.

China nung rong Wuzhishan, Changbaishan aser Kunlunshan desema rongtem, actual combat training aser beach landing exercises nung shilem agitsü atema tzyüimi yokogo, ta state media sangdong ka ajanga metetdaksü.

Maneni iba sentong nung shilem agitsü atema China nung rongtem timba yoktsü sentong lir, koba Bodhbarnü tenzütsü.

Bodhbarnüsa China indang Maritime Safety Administration-i, January 27 nungi 30 tashi Leizhou peninsula anüolen Tonkin Gulf nung tesem telongtet kati shinga maotsü tetuyuba agütsüogo.

USS Theodore Roosevelt-i anir America nung indang aircraft carrier telok ka Honibarnü South China tzyüimi ao.

China-i SCS ya timba parnok meyong ta ashir saka kidanger Philippines, Brunei, Malaysia, Indonesia aser Vietnam o Taiwan-ia iba tzyüim ya parnok meyong ta shia arudar.

China foreign ministry otongdar, Zhao Lijian-i Mongolbarnü, Biden lenisüba kübok Washington-i China den inyaksangshi melenshitsu imlaba lemsatep.

Zhao-isa, taoba kümtem nung Trump administration-i inyakyim nung aibelenogo aser China ya tetokteper ka ama agi, aser iba dak ajemdaker jenjang balala agiogo, koba ajanga China telung inyakyim nung kongshi aser China tejangrabatem raksatsüogo, ta ashi.

December 23 nü US Navy-i ashiba agi, China-i SCS nungi anogo ka tejakdang America nung indang warship ka mintokogo, ta teyazü ashi aser iba ajanga Beijing-i iba tesem ya parnok meyong ta sayuner.

Beijing-i ashiba agi, parnoki US destroyer USS John S. McCa SCS tzyüim nung mangatettep adoker aliba tesem adena aoba mapang parnok amokmerentsü atema rong aser tayimtsütem yoka liasü.

"Mision dak sendakba nung PRC-i osang agütsüba ya tai. USS John S. McCain kecha linük nungia memintok," ta US Navy indang 7th Fleet otongdar Joe Keiley-i ashi.

Otongdar-i ashiba agi, iba rong tinyaktsü mapa tembanger iba tesem toktsür ao ashi shingaia memintok.

Italy Ato Kiloner Conte mapa nungi anentsü



Rome, Aenjeti/January 26 (Agencies): Coronavirus tashidak wara junga ketdang mesütetba atema aitsüba sülen Italy Ato Kiloner Giuseppe Conte ya mapa nungi anentsü temolungtetba nung lir.

Italy nung nisung 85,000 dak tema COVID-19 tashidak agi süogo.

Senate nung pa telok ajema akumba sülen sorkar tashi taitba ka tentetsü atema tiri pa nem maongka agütsütsü Conte teimla lir.

Pai yamaji meinyaktetra mapa ya kari bena atatsü aser aji mesüra election tasen agishitsu.

2018 küm nungi teloktem sorkar ana tashinung tekolakba alisang law professor ya Tir Sergio Mattarella ajuruba mapang lir, shibai lenmang lapoktsü atema telemtetba agütsütsü.

Mongulbarnü Conte-i par cabinet dang pa mapa nungi anentsü atema tezüluba nung agütsütsü, ta ashi.

Taoba hopta lower house, Chamber of Deputies nung vote of confidence agitepba mapang Conte kumzüka liasü. Iba sülen pai Senate vote nunga takok

angu, saka absolute majority mongutet.

Senate nung pa den adener timba masüba ajanga sorkar inyaksangshi nung tetsükdaktsü ajurur, anungji yimten anokshitsür.

Taoba ato kiloner Matteo Renzi-i par liberal Italia Viva party tila ya teloktep sorkari nungi atsüginginba sülen confidence vote ya agitepa liasü. Onoki akhangba tem Conte-i ataloktsüba sülen ang meyipa arutsü, ta Renzi-i ashi.

COVID-19 tashidak wara agi timtem ajurua aliba yaritsü atema European Union ajanga renemba recovery fund, sen billion €750 atema Conte-i sen billion €209 (\$254 billion) indoktsü sentong yangluba nung pai tai apu.

EU sen ya digital aser green technology ama tarutsü teimla aliba sector tem nung indoktsüla aser senotsü lezmzütsütsü atema MP temi masü saka technocrats temi telemtetba agiba maginer, ta Renzi-i ashi.

Hopta tatemlen obendangba bangdak nung temelenshi asoshi vote agütsüteptsü lia pa mapa nungi anentsü osang ya angashir.

CHRISTIAN STANDARD HIGHER SECONDARY SCHOOL CHANGTONGYA TOWN

ADVERTISEMENT

NO. OF POST	NAME OF POST	QUALIFICATION
One (1)	Economics Teacher	Post Graduate in Economics with good communication skill.

The intending candidates may send your application and resume on or before 3rd February 2021 at cshss2017@gmail.com or contact 8974965991 (Principal), 8837269573 (Managing Board Chairman).

Sd/-
Principal

BMSCH Kohima-i sentong ka ayongzük



Kohima, Aenjeti/January 26, 2021 (TYO): National Girl's Child Day shilem ama, India nung tetsür aser tebur bendanga amshiba nung tekümdangtsü osang sangdongtsü nükjiding nung, Hombarnü (25.01.2021) Bright Morning Star Children Home (BMSCH) Kohima-i sentong ka ayonga agiogo.

Iba sentong agiba mapang, BMSCH superintendent Aleno-i tanurtem dang lokti nung tebendang kecha melii ajak (tetsür o tebur) meimtsü

aser akhümtsübuttsü asoshi ajungshia liasü.

Lai, India nung tetsürtem tila asü dang nungi bendanga amshiba, maksütsüba den mezüngmeshiba indang sasaseta bilemstüba telok den lemsatep.

Iba dak sendakba nung, tetsür tanur bendanga amshiba nokdangtsü aser lokti nung temelenshi adokdaksütsü asoshi tongtibang shilem agitsüla, ta lai tanurtem ajungmeso.

Iba anogomung nüngtem

nung, BMSCH-isa drawing aser slogan tetoktepba ayongzük.

Junior category nung, Visakholie Andrew, Dolensangla aser Thejavilie nungeri Ibuba, 2buba aser 3buba jenjang angu.

Kasa tetoktepba senior category nung Meztuo Tutu Jack aser Thepfülhoutuo Khro nati mezüngbuba aser tanabuba jenjang ajangzükter.

Iba tetoktepba atema Ruokuo Angami aser Abo Puro na tetendanger liasü.

IRCS Dimapur-i face mask lema agütsü



Dimapur, Aenjeti/January 26, 2021 (TYO): Dimapur District Administration ajanga teyuba ama, Mongolbarnü (26.01.2021) DDSC Stadium nung 72buba Republic Day sentong reprangi arur ajak nem, Indian Red Cross Society, Dimapur District Branch tenüng nung Dr. Amos Lkr-i anir pa den külem

inyaker Nursing Volunteer temi tejak nembangba mask lema agütsü.

Iba maparen ya Red Cross indang züngsem Mr. Sujoy Das aser Ms. Mamta Karir nati nungita liasü.

Tang ama tensa ka nung mapa tajung ajiteta inyakba asoshi, Dimapur District Red Cross Branch indang

Executive Committee-i züngsem aser volunteer ajak dang pelaba metetdaksü.

Kasa mapang, IRCS Dimapur-i, Republic Day anogomung nüngtem nung Dimapur nung alir sensopur ajak dang tepela salem lemsatep aser Nagaland nung temoatsü alitsü atema maneni telongjem nung inyaksü asoshi ayongzük.

Naga People Front-i senden ayongtsü

Dimapur, Aenjeti/January 26, 2021 (TYO): NPF temzüng indang Clause 3 of Art. V ajanga tashi agütsüba amshia, Naga People Front, President Dr. Shürhozelie Liezietsu-i Brehostibar (28.01.2021)

anepdang 11:00 ako meta NPF Central Office HQs. Kohima nung NPF Legislature Wing aser Party indang Core Committee den telongjem senden ka ayongtsü.

Anungji, züngsem ajak iba

senden nung aruagi adentsü asoshi mepishir.

Iba senden ya COVID-19 dak sendakba Standard Operating Procedures (SOP) nung anidak agitsü, ta NPF, Secretary General-i metetdaksü.

MULUNGNE N O

Onok Asür Rtd. ABSI. Sakulemba Ao (Changki)-er kinungertemi pa mapang tatsüka shiranga alidang aser January 17, 2021 anogo pa alima nungi pilar, onok timtem aser mangyim jashi nung alidang sarasadem, nübo aser rongsen agi onok meima yaritem ajak dang kanga pelaba metetdaksür. Onoki ano, talisa, item dang ya pelaba shisemer:

1. Chumukedima Ao Baptist Arogo
 2. Akhori Kidong
 3. Ward 9 Chümoukedima, Chairman & Members
 4. Changki Fellowship, Chümoukedima
 5. Changki Union, Chümoukedima
 6. Changki Kaketsuri Longjem, Chümoukedima
 7. ESA Telongjem, Chümoukedima
 8. Dr. Talimoa Longkumer
 9. Doctors & Nurses, Zion Hospital & Research Centre Dimapur
 10. Doctors & Nurses, Civil Hospital Dimapur
 11. Chairman & Members of Chümoukedima Village Council
 12. Chairman, Head GB & Members of Chümoukedima Town Council
 13. Kidang-kiyongertem, tembar medemertem, kinunger adianutem aser temeimertem.
- Onoki nenok ajak dang kanga pelar aser Tulusang Tsüngremi nenok ajak talubosa moajangma.



ASO : 01-01-1958
ASÜ : 17-01-2021

- Temeim Kinungsü, Chirnurtem, Ojala aser Kinungertem.

MENUNGRA BILEMTETER

Temeim Supongaren, tanü na onok nungi pilaa Yisu dangi orr küm ka ajunger, ajisüaka onoki anogo shia nü mapa tajungtem aser yimya tsülaola amatsü makok. Onok mulungjang nung na teti lir. Nai toktsür aoba kinungertem tanü na bilemteta sarasadema amonger.

Temeim Oba, Oja aser
Kinungertem.



Lt. Supongrenla
(Mopungchuket)
Tasüba anogo : January 27, 2020.

India nung LG K42 smartphone saya

New Delhi, Aenjeti/January 26, 2021 (Agencies): Electronics yangluba company LG-i India nung 'LG K42' ta nüngja agütsüba smartphone tasen ka sayaogo. Iba smartphone ya military-grade MIL-STD-810G certified alitsü.

South Korean tech company ajanga angazükba agi, iba smartphone yagi US Military defence standard indang telemsa tuku ajangzükteretogo, kong 'high temperature', low temperature, temperature shock, vibration, shock aser humidity densema lir. Tanga tongtibang feature tsütsü reprangdangra, LG K42 nung quad rear cameras aser MediaTek Helio P22 (MT6762) processor angutsü.

Taoba küm September ita iba smartphone ya Central America aser Caribbean tesem nung mezüng sayaba ajaki jangjaa lir.

LG K42 nung 6.6-inch HD+ (720x1,600) display inoka yanglutsüogo, kong narrow bezels aser 20:9 aspect ratio dena lir. Phone display panel nung 8-megapixel selfie camera atema 'centrally-aligned hole-punch cutout' inoktsüogo. Iba smartphone inyakyim octa-core MediaTek Helio P22 SoC den 3GB RAM aser 64GB onboard storage ajanga nungitsü. LG K42' tesülen quad camera ya square camera module nung inokja lir aser tesangwa peria

malidak LED flash teyari ajanga noksa tejangjaba tangoktetsü.

Iba smartphone tesülen camera setup nung 13-megapixel primary camera, 5-megapixel super-wide-angle secondary camera aser 2-megapixel depth sensor densema lir. Iba den külemi camera setup nungsa 2-megapixel macro shooter ka inoktsüogo.

LG-i ashiba agi, LG K42 indang camera app nung feature talisa 'Flash Jump Cut' inoksemtsüogo, koba ajanga mapang tatsüka tsüngda noksa pezü tashi atonga tangokteter. Iba den külemi, noksa tangoktsü aliba mapang shitak metetdaksütsü atema "Time Helper" feature kati yaritsü.

LG K42 nung tanga feature tsütsü reprangdangra, iba smartphone nung 4G LTE, Wi-Fi, Bluetooth v5.0, GPS/A-GPS aser USB Type-C port angutsü. Phone maparen 4,000mAh battery kati nungitsü aser phone touzük gram 182 asütsü.

India nung LG K42 - 3GB RAM + 64GB storage variant jenjang sen 10,990 alitsü aser talirtemi phone ya Gray aser Green sentsü nung Flipkart ajanga angutsü. LG K42 customer temi küm ana extended warranty den külemi angati 'one-time screen replacement' angutsü.

Dimapur-i G.Rio Memorial U-19 (tebur) asayamung kokogo



Dimapur, Aenjeti/January 26, 2021 (TYO): Dimapur team-i 1buba Late G. Rio Memorial U-19 (Boys) Inter-District Tournament takok marok nguogo.

Iba asayamung final Dimapur aser Peren na tsüngda asaya. Peren-i toss koka mezüing bat asütsü shim. Over 26.2 nung Peren team pur run 75 dang yanglur asayar ajak out süadok.

Team atema Parbez (c)-i run 32 yanglu.

Dimapur team nungi bowler Arjun-i wicket 3 aser Renben N Odyuo o Rahul nati wicket anana out sütsü. Kasa team nungi Keduowhetuo aser Daniel Jamir nati wicket ka ka agi.

Tanabuba innings nung Dimapur team-i over 12 nung run 78 yanglu aser asayar 5 out asü. Dimapur atema Sujal-i run

43* aser Tohuka Zhimo (c)-i run 13 yanglu.

Peren nungi bowler Ranjen-i wicket 4 agi.

Dimapur-i Peren madak wicket 5 agi takok angu.

Iba asayamung Dimapur District-i takok angu aser Runners- Up team ji Peren District alitsü.

Kasa asayamung nung Mokochung District-i Late G.Rio Spirit of Cricket Award; Rokovoto Nyekha (Peren)-i Player of the Tournament; Mughavi (Zunheboto)-i Best Batsman; Raja Swarnkar (Dimapur)-i Best Bowler aser Yungandhar Singh (Dimapur)-i Best Wicket-Keeper award angu.

1buba Late G. Rio Memorial U-19 (Boys) Inter-District Tournament shibangba sentong

nung asür G. Rio'er jabaso aser Advisor, Sericulture, Excise & Minority Affairs, Govt. of Nagaland, Zhaleo Rio, IAS (Rtd.)-i takok angurtem nem sempet lema agütsü.

Zhaleo Rio-i jembiba mapang, pai asayartem ajungshi aser cricket facility tem maongka tajung ama agütsü asoshi ayongzüik. Iba den bendenloksema, pai takok angur team nem tenüingsang agütsü aser Nagaland Cricket Association danga pelaba lemsatop.

Maneni, iba asayamung takok ngua agitetba atema Nagaland Cricket Association-ia asayamung nung shilem agir District tem, alakteta tejaoker aser Nagaland nung cricket tentet ajak dang pelaba metetdaksüogo.

Mouma densema saisaponger trok nem Padma Shri award agütsü

New Delhi, Aenjeti/January 26, 2021 (Agencies): 72buba Republic Day amungtsü anogo ka tejakdang, India Sorkar ajanga table tennis asayar tejen Mouma Das aser PT Usha indang coach Madhavan Nambiar densema India nunger saisaponger tenet nem Padma Shri award agütsü.

Mouma aser nungtugu athletic coach, OM Nambiar na dak alia, taoba mapang India tetsür basketball team captain P Anitha, long-distance runner Sudha, taoba mapang Indian wrestler Virender Singh aser para athlete KY Venkatesh nunger nem sports category nung linük indang civilian award tematiba rongnung pezübuba award agüja tushio.

Küm shia, Republic Day anogomung amungtsü aliba anogo ka tejakdang category balala nung award takok angurtem tenüing sangdonger. Padma awardr ya India Tir ajanga agütsür.

Mouma, shibai 2013 küm Arjuna Award takok angu, Achanta Sharath Kamal-i Padma Shri anguba sülen, iba award angur table tennis asayar rongnung la tanabuba kümogo. 2019 küm Sharath-i iba award angu.

"2019 küm December ita ni tanur aso aser iba sülen Covid-19 wara ajanga table tennis

asayatsü maongka mangu. Iba award tulu ajanga kü wadang nung tali temulung agüja tajungba asayatsü aser linük atema tenüing tajung bener arutsü asoshi tali dang ajungmesotsü," ta Commonwealth aser South Asian Games asayamung nung medal angula Mouma-i ashi.

Sudha, shibai 2012 küm Arjuna award takok angu, iba award angur rongnung la ya nungtugu athlete tanabuba lir. 3000 metres steeplechase asayamung nung la ya Indian Olympic athlete ka lir.

Iba asayamung nung lai national record ajanzüktet aser 2005 küm nungi India tenüing nung lai international saisapong nung shilem agiogo.

3000 metres steeplechase asaya nung Singh ya Asian champion ka lir aser Asian Games den continental championships asayamung balala nung lai gold medal ana aser silver medal pezü takok angu. 2012 aser 2016 küm India tenüing nungi lai Olympic Games asayamung ana nung atonga shilem agiogo.

Nambiar, shiba Usha indang coach ka liasü, 1985 küm pai Dronacharya award angu.

1992 küm Cali, Colombia nung ayongzüikba World Wrestling Championship asayamung nung wrestler Virender-i bronze medal

takok angu.

1995 küm Commonwealth Championship asayamung (Senior, 74kg, freestyle) nung Virender-i silver medal takok angu.

2005 küm World Dwarf Games nung medal aika anguba atema Limca Book of Records nung tenüing züingoksang Para Athlete Venkatesh-ia Padma Shri award nguogo. 1994 küm Berlin, Germany nung mezüing International Paralympic Committee (IPC) Athletics World Championship asayamung nung India tenüing nungi pai shilem agiogo.

Anshu Jamsenpa ya Indian mountaineer ka aser season ka nung Mount Everest tenem tashi tuteter tetsür rongnung la mezüing lir. Iba den külemi anogo pungo tsüngda anaben tashi Mount Everest talak tashi tuteter rongnung la alitsü.

Taküm, Padma Shri dak alaka, saisaponger kati danga Padma Vibhushan aser Padma Bhushan mangu.

Sports category nung takok angurtemji P Anitha (basketball), Mouma Das (table tennis), Anshu Jamsenpa (mountaineering), Sudha Singh (athletics), Virender Singh (wrestling in deaf category), KY Venkatesh (para-athlete) aser Madhavan Nambiar (athletics coach) nunger lir.

Taoba India goalkeeper Prasanta Dora süogo

Kolkata, Aenjeti/January 26, 2021 (Agencies): Taoba mapang India goalkeeper Prasanta Dora, shibai Kolkata Maidan indang club tulu asem atema asaya nungtugu aküm, Mongolbarnü pa iba akümlü nungi pilaogo. Pa arishi küm 44 liasü aser Dora-i par jabaso arishi küm 12 tain Adi aser kinungtsü Soumi na toktsür asü.

Prasanta Dora teti tambusang, Hemanta, shibai Mohun Bagan aser India team atema goalkeeper ama asayaogo, pai ashiba agi, Prasanta ya metetemi temang meta shirangba sülen December ita pa dak H e m o p h a g o c y t i c lymphohistiocytosis (HLH) tashidak aliba putet.

HLH ya systemic inflammatory syndrome tesashi ka lir, koba ajanga immune system nung timtem tulu mesüra cancer tashidak adokdaksür.

"Pa indang 'platelet count' kanga dang ajema kumadok aser doctor temi iba tashidak putettsü atema mapang talangka agi. Iba sülen, Tata Medical (New Town nung cancer care centre ka) nung anepalu. Anogoshia pa nem azü agütsütsüsa aküm, saka pai iba tashidak mekokteti tanü anüingdang 1.40 ako meta süadok," ta PTI dang Hemanta-i ashi.



India Football team atema adianu Prasanta aser Hemanta napronglai nungtugu asayar adianu tarep Pradip Kumar aser Prasun Banerjee, Climax aser Covan Lawrence den Mohammed aser Shafi Rafi nunger den külemi asayaogo.

1999 küm India nung group IX Olympic qualifier atema India atema Thailand den mezüing asayar sülen, India tenüing nungi Prasanta-i SAFF Cup, SAF Games den tanga asayamung pungo nung shilem agiogo. Iba den külemi, 1997-98 aser 1999 küm Santosh Trophy asayamung nung Bengal-i takok anguba mapang, Prasanta-i Best Goalkeeper award angu.

Maneni, club-level nung Calcutta Port Trust, Mohammedan Sporting, Mohun Bagan aser East Bengal nung madendang, Prasanta-i Tollygunge Agradami nung mezüing asaya tenzüik.

Tractor rally: Shah-i... (Tapak 7 nungi...)

Punjab CM-i mangatettep adokba aitsü

Linük yimtiba nung aluyimertemi ayongba tractor rally mapang mepetmesü adokba sülen Punjab chief minister Amarinder Singh-i tweet süa liasü. "Delhi nung tatalokba ya taoksatsüka. Azütokshi maparen ya agizüksü makok. Iba ajanga aluyimertemi yimjung nung parnok taginüba khanga aliba raksatsütsü. Kisan lenirtemi parnok sasa atsüingnogo aser #TractorRally thitsüogo. Ni aluyimer ajak dang Delhi toktsür arrtsüi meyipa aotsü mepeshir," ta Singh-i tweet asü.

Mongolbarnüsa Punjab chief minister Amarinder Singh-i, Ato Kilonser Narendra Modi dang aluyimertem takhangba agizüksü mepeshia asüingdangogo aser ashiba agi, aluyimba ozüing tasentem ya khenyongi tai lir.

Longkak aitiba aluyimertem den pa dena lir ta shia, Punjab CM-i aluyimertem dang 'tractor rally' yimjung nung agütsü mepeshia liasü.

Ajisüaka aluyimertemi parnok senzütsü atema temelaba agütsür aliba lenmang

toktsür central Delhi leni ao aser iba ajanga police tem den mangatettep adok. Delhi kübok tesem balala nung longkak aiter meyirejang aika police tem den mangatettep adoka liasü.

A l u y i m e r t e m i s a tenokdangba agütsür aliba rakpoker Red Fort leni ao. Aluyimer noklang aika police tem den sung amer züktepba aser parnok indang tractor tem police temi anendena yur aliba bus tem nung tsükoktsüba nguogo aser iba ajanga police temi parnok dak azük tenzüik aser tear gas khaloktsü.

Ghonda aika mangatettep adokba sülen Mongolbarnü nikongtsütsü aluyimertem karbo pei anenzüka aliba tesemi meyipaogo, ajisüaka ano linük yimtiba kübok ITO, Nangloi aser Mukarba Chowk tesem nung aluyimertem meyirejang aika anenzüka lir. ITO crossing nung aluyimertem aika mena lir aser Singhu arrtsü len nungi aruba aluyimertem aika Delhi indang Outer Ring Road leni aoba osang angazükogo.

Maneni aluyimertem aika Tikri aser Ghazipur arrtsü nung longkak aitiba tesemleni meyipa aoba nguogo.

BILEMDANGANG

"Pela lira anogo ao memeteter."